

摩訶僧祇律

卷二十七

三百七  
登十

2

11

12

4982  
4



元祿七年正月一日重脩  
 山王國聖圖 崇德銀呂  
 佛日增輝 懺輪空轉  
 山城州天安寺法金剛院置



11

12

11

12

摩訶僧祇律卷第二十八

登

東晉三藏法師佛陀跋陀羅共沙門法顯譯

佛住舍衛城廣說如是爾時梨車摩訶男請  
僧施藥時六群比丘聞摩訶男請僧施藥當  
試惱之明日晨起著入聚落衣到其家共相  
問訊我聞檀越請僧施藥為實爾不荅言實

爾尊者有所須耶荅言須藥須何等藥荅言  
須爾所蘇爾所油尔所蜜尔所石蜜爾所根



藥葉藥華藥菓藥彼言即日未具須辦當與  
比丘言汝當備藥然後請僧供一比丘藥如  
給一大象我今一人索藥尚不能得況復眾  
多汝但求名譽無有實心彼言尊者王家庫

截尚無爾所藥況復我家須辦當與比丘言與  
已不與當任汝意言已便出檀越於後即辦衆  
藥自往白言先所索藥今者已辦便可來取  
比丘聞已並笑而言我前試汝實不須藥彼  
曰何故相試我家中所有於佛比丘僧無有  
匱惜比丘言檀越瞋耶荅言實瞋若瞋者我  
當悔過彼曰我不受悔過自可向佛悔過比  
丘即向佛悔過佛言何故即以上事具白世  
尊佛言癡人梨車摩訶男家所有愛重於佛  
比丘無所匱惜何故擾亂從今日後聽四月  
別請應受除更請除長請佛告諸比丘依止  
舍衛城比丘皆悉令集以十利故與諸比丘

制戒乃至已聞者當重聞若比丘四月別自恣請應受若過受波夜提除更請長請自恣請比丘者如上說四月者或夏四月或冬四月或春四月別請者私請過者過四月除更請者世尊說無罪除長請者盡形壽請波夜提者如上說若檀越語比丘言尊者受我夏四月請比丘若受不應過至八月十六日受者波夜提若受冬請春請亦如是檀越請不必定或四月或一月或半月若期滿已不得更受若檀越言尊者常此間住者我長施食若比丘離一宿行者不得復食若檀越言尊者何以不來答言汝先言常此住者當施食我

以離宿是故不來檀越言離不離從今日但來  
如是受者無罪檀越言尊者受我請食盡此  
倉穀比丘受之應數數問典倉者若言噉盡  
不得復食若檀越言尊者何以不來荅言我  
先受請盡此倉穀穀今已盡是故不來若言  
尊者我非謂一倉更有餘倉從今日但來如是  
受者無罪請食蘇瓠苜蓿亦復如是若檀越言  
尊者受我請食盡此牛乳比丘受之應數數問  
搆乳者若言搆休不得復受若言何以不來  
荅言我先受請盡此牛乳乳今已盡是故不  
來若言我非謂一牛更有餘牛從今日但來  
如是受者無罪若檀越言尊者受我請食齊

女夫住此比丘應受若女夫去者不得復食  
若言何故不來答言我先受請齊女夫住女  
夫今去是故不來若言更受我請如是受者  
無罪若言尊者受我前食不得索後食若請  
後食不得索前食若請與非時將水不得索藥及  
餘物若請與塗足油不得索非時漿若請與  
藥者應從索藥若言尊者盡壽受我請衣食  
卧具醫藥爾時得隨意索無罪是故說

佛住拘睢彌國廣說如上爾時諸比丘語闍  
陀言長老當學莫犯五衆罪答言我今不隨  
汝語我若見餘長老寂恨多聞持法深解我當  
從諮問彼若有所說我當受行諸比丘以是因

緣往白世尊佛言呼此闍陀比丘來來已佛具  
問上事汝實爾不荅言實爾佛語闍陀此是  
惡事汝常不聞我無量方便稱嘆隨順毀咎  
違逆汝云何憊戾自用此非法非律非如佛  
教不可以是長養善法佛告諸比丘依止拘  
睒彌國住者皆悉令集以十利故爲諸比丘制  
戒乃至已聞者當重聞若諸比丘教語當學  
莫犯五衆罪若作是言我今不隨汝語若見  
餘長老寂根多聞持法深解當從諮問彼有  
所說我當受行作是語者波夜提比丘欲得  
法利者應學亦應問餘比丘比丘者如上說  
五衆罪者波羅夷僧伽婆尸沙波夜提波羅



提提舍尼越毗尼罪莫犯者教令學十二事  
十二事者所謂戒序四波羅夷十三僧伽婆  
尸沙二不定三十尼薩耆波夜提九十二波  
夜提四波羅提提舍尼衆學法七滅諍法隨順  
法當學莫犯作是語時荅言我不隨汝語若  
見餘長老寂根多聞持法深解當從諮問彼  
有所說我當受行作是語者波夜提若言長  
老五衆罪中波羅夷僧伽婆尸沙波夜提波  
羅提提舍尼越毗尼罪當學莫犯作是語時  
荅言不隨汝語若見餘長老寂根多聞持法  
深解當從諮問彼有所說我當受行作是語  
者波夜提如是四衆罪三衆罪二衆罪一衆

罪四波羅夷。應當學莫犯。作是語時。答言。我不隨汝語。若見餘長老。寂根多聞持法深解。當從諮問。彼有所說。我當受行。作是語者。波夜提。若作是語。長老作六捨法。所謂作折伏羯磨。不語羯磨。駢出羯磨。發喜羯磨。舉羯磨。別住羯磨。當學莫犯。作是語時。答言。我不隨汝語。若見餘長老。寂根多聞持法深解。當從諮問。彼有所說。我當受行。作是語者。波夜提。若作是語。長老此六作捨法。已作折伏羯磨。隨順行法。折伏柔輒。如是應捨。乃至別住羯磨。亦復如是。當學莫犯。作是語時。答言。我不隨汝語。若見餘長老。寂根多聞持法深解。當

從諮問彼有所說我當受行作是語者波夜  
提若言長老汝當學賢善持戒受誦經法當得  
須陀洹斯陀含阿那含阿羅漢果作是教時  
不得荅言有常當學應荅言我爲是故出家  
是故說

佛住拘睒彌國廣說如上爾時拘睒彌界有  
惡龍名菴婆羅能使亢旱不雨苗稼不收人  
民飢饉如是種種災患時尊者善來比丘往  
降惡龍如善來比丘經中廣說降伏惡龍已  
乃至國土豐樂人民感德知恩報恩有五百  
大家爲善來故各立常施設幢施設床座請  
僧供養別請善來比丘其所造家則設種種

美食時有一家施食之後因渴施酒色味似  
水得而飲之還向精舍介時世尊大會說法  
酒勢發盛昏悶躡地當世尊前舒脚而卧佛  
知而故問是何比丘在如來前舒脚而卧比丘  
荅言善來比丘飲酒過多是故醉卧佛問諸  
比丘此善來比丘先曾晝寢不不也世尊復  
問比丘善來未醉之前頗曾佛前舒脚卧不  
不也世尊復問比丘多飲酒已欲使不醉可得介  
不不也世尊復問諸比丘設使善來比丘不飲  
酒時聞說微妙不死之法當欲失是善利不  
聽受不不也世尊佛語諸比丘是善來比丘  
本能降伏惡龍今者能降城嶺不荅言不能

佛言設使菴婆羅龍聞者生其不樂從今日後不聽飲酒

復次佛住舍衛城廣說如上爾時尊者那夷翅飲石蜜酒過多來還釋精舍尔時世尊大會說法酒勢發盛昏悶躡地在世尊前舒脚而卧佛知而故問是何比丘在如來前舒脚而卧荅言世尊是那夷翅比丘飲石蜜酒過多是故醉卧佛問諸比丘那夷翅比丘先曾晝寢不不也世尊復問比丘那夷翅未醉之前頗曾舒脚佛前卧不不也世尊復問比丘若多飲酒已欲使不醉可得尔不不也世尊復問比丘那夷翅不飲酒時聞說如是微妙不

死之法當欲失是善利不聽受不不也世尊  
佛言從今日後不聽飲石蜜酒佛告諸比丘  
依止舍衛城住者皆悉令集以十利故為諸  
比丘制戒乃至已聞者當重聞若比丘飲酒  
石蜜酒波夜提比丘者如上說酒者十種和  
甜成動酢漬黃屑澱清和者飯屑麩屑水和  
著器中如是不得草滴髮滴入口況復器飲  
波夜提是名和甜者和釀已訖始變生甜乃  
至飲者波夜提是名甜成者氣味成就乃至  
飲者波夜提是名成動者酒勢已壞乃至飲者  
波夜提是名動酢者酒味小壞勢變成酢乃至  
飲者波夜提是名酢漬者淨浣白疊漬著酒

中數數出曬曬已復漬遠行曠野時漬壘中校  
取乃至飲者波夜提是名漬黃者澄黃未清  
乃至飲者波夜提是名黃澱者酒下濁滓乃  
至飲者波夜提是名澱清者上澄清如油色  
如是不得草滴髮滴入口況復器飲波夜提  
是名清石蜜酒者十種和甜成動酢漬屑黃  
澱清和者石蜜蘗水和著器中如是不得草  
滴髮滴入口況復器飲波夜提餘九事亦如  
上說波夜提者如上說穉麥人醪米飯醪麥  
飯醪木麥醪麩醪穉麥人醪者穉麥人蘗水  
於器中釀如是不得草滴髮滴入口況復器  
飲波夜提米飯醪者米飯蘗水於器中釀乃至

飲者波夜提麥飯醪者麥飯蘗水於器中釀  
乃至飲者波夜提木麥醪者木麥飯蘗水於  
器中釀乃至飲者波夜提麩醪者麩蘗水於  
器中釀如是不得草滴髮滴入口況復器飲  
波夜提食後飲水無罪食麩越毗尼罪飯麩  
合和飲者波夜提食石蜜飲水無罪食蘗越  
毗尼罪三種合和飲者波夜提飲穀酒石蜜  
酒波夜提飲蒲桃酒越毗尼罪飲修樓飲難  
提嗽糟皆越毗尼罪食墟邏菓迦毗哆菓毗  
邏婆菓拘陀邏菓此諸菓食者令人醉食者越  
毗尼罪除十四種漿菴婆邏漿乃至耶婆菓漿  
澄清一切聽飲若變酒色酒味酒香一切不



聽飲酢漿令人醉者亦不聽飲除甘蔗苦酒  
蒲桃苦酒及酢漿是故說

佛任拘睒彌國廣說如上爾時僧和合欲作  
羯磨時尊者闍陁不來遣使往喚語闍陁比  
丘僧和合欲作羯磨長老來而不肯來諸比  
丘語闍陁佞戾若喚來必不來若語莫來脫  
有來理卽遣使語長老莫來彼言住住汝等  
盡往語我莫來即便來入僧中比丘語令坐  
而不肯坐諸比丘復語長老莫坐卽言汝等盡  
坐語我莫坐便坐比丘復語長老汝何論是  
事答言我不語比丘復語長老莫語卽言汝  
等盡語語我莫語便語旣語不止妨廢餘人

諸比丘復語長老可小出而不肯出比丘復  
言長老莫出即便出出故僧不和合各各起  
去不得作羯磨諸比丘以是因緣往白世尊佛  
言呼闍陀比丘來來已佛具問上事汝實尔不  
荅言實爾佛言此是惡事闍陀汝常不聞我  
無量方便歎說隨順軟語毀些佷戾汝云何  
佷戾自用此非法非律非如佛教不可以是  
長養善法佛告諸比丘依止拘睒彌住者皆  
悉令集以十利故與諸比丘制戒乃至已聞  
者當重聞若比丘輕他波夜提比丘者如上  
說輕他者有八事語來而不來莫來而來坐  
而不坐莫坐而坐語而不語莫語而語去而

不去莫去而去波夜提波夜提者如上說若  
比丘僧集欲作折伏羯磨不語擯出發喜舉  
別住羯磨一切盡應來若輕他不來者波夜  
提若比丘作衣鉢事若病因緣不得來者與  
欲無罪若語莫來輕他來者波夜提若已僧  
中有事欲須見僧白僧聽來無罪若言長老  
坐輕他不坐者波夜提若坐處有瘡應白僧  
聽者不坐無罪若語莫坐輕他坐者波夜提  
若老病羸弱久立悶極白僧聽者坐無罪若  
語令語輕他不語者波夜提若才劣言輕人  
不敬用設語羯磨不成就不和合白僧聽者  
不語無罪若語莫語輕他語者波夜提若作

是念設不語者羯磨不成就僧不和合事須  
我語白僧聽語者無罪若語令去輕他不去者  
波夜提若作是念若我去者此中羯磨不成  
就事不斷當白僧聽者不去無罪若語莫去  
輕他去者波夜提若作是念若我不去者羯  
磨不成就事不斷當白僧聽者去無罪若僧  
中語來不來莫來而來駈坐而不坐莫坐而坐  
語而不語莫語而語去而不去莫去而去一  
一得波夜提罪若衆多人中師徒中語來而不  
來乃至去而不去一一得越毗尼罪若和尚  
阿闍梨語來而不來乃至去而不去一一得  
越毗尼罪是故說

佛住舍衛城廣說如上爾時諸比丘諍訟同  
住不和時六群比丘屏處盜聽聞此語已向  
彼人說聞彼語已向此人說於是彼此更生  
諍訟同住不和云是法非法是律非律乃至  
是應羯磨是不應羯磨諸比丘以是因緣往  
白世尊佛言呼是六群比丘來來已佛具問上  
事汝實爾不荅言實爾佛語六群比丘此是  
惡事非法非律非如佛教不可以是長養善  
法佛告諸比丘依止舍衛城住者皆悉今集  
以十利故爲諸比丘制戒乃至已聞者當重  
聞若比丘諸比丘諍訟時默然立聽彼有說  
者我當憶持作是因緣不異者波夜提比丘

者如上說諍訟者是法非法是毗尼非毗尼  
乃至是應羯磨是不應羯磨立聽者若隔壁  
若隔籬若戶邊若隔幔若隔石若隔草立聽  
彼有說者我當憶持作是因緣不異者波夜  
提波夜提者如上說若二比丘在堂裏私語  
若比丘欲入者應彈指動脚作聲若前人默  
然者應還出若前人故語不止者入無罪若  
一比丘先在堂內坐二比丘私語從外來入  
堂內比丘不得默然應彈指動脚作聲若默  
然者堂內比丘應出若比丘共餘比丘鬪諍  
結恨作是罵詈我要當殺此惡人然後捨去  
比丘聞已得語彼人長老好自警備我聞有惡

聲有諸客比丘來若在講堂溫室禪坊中住若  
摩摩帝若知事人往看客比丘聞客比丘作  
是言長老我等當盜某庫藏某塔物某僧淨  
廚某比丘衣鉢聞是語已默然應還還已應  
衆僧中唱言諸大德某庫藏某塔物某僧淨  
廚某比丘衣鉢當警備我聞惡聲應使前人  
知若比丘多有弟子日暮竊來案行諸房知  
如法不若聞說世俗談譁若說王說賊如是  
種種言說不得便入呵責待自來已然後誨  
責曰汝等信心出家食人信施應坐禪誦經  
云何論說世俗非法之事此非出家隨順善  
法若聞論經說義問難答對不得便入讚歎

待自來已然然後讚美汝等能共論經說義講  
佛法事如世尊說比丘集時當行二法一者  
賢聖默然二者講論法義若比丘入聚落行  
語而去後比丘來不得默然應聲咳動脚作  
聲若前人故語者隨進無罪若比丘前去後  
比丘行語而來前比丘不得默然應聲咳動  
脚作聲若比丘遶塔時食後欲入林中坐禪  
時亦復如是是故說

佛住舍衛城廣說如上爾時比丘僧集欲與  
優波難陀共行弟子依止弟子作舉羯磨時  
優波難陀聞與弟子作舉羯磨即便起去後  
比丘見坐處空檢校誰來誰不來是誰坐處



比丘言是優波難陀坐處如是僧不和合各  
各起去不得作羯磨諸比丘以是因緣往白  
世尊佛言呼優波難陀來來已佛具問上事  
汝實爾不荅言實爾佛語優波難陀此是惡  
事汝云何僧欲斷事默然起去不白比丘此非  
法非律非如佛教不可以是長養善法佛告  
諸比丘依止舍衛城住者皆悉今集以十利  
故與諸比丘制戒乃至已聞者當重聞若比  
丘僧欲斷事默然起去不白比丘波夜提比  
丘者如上說僧欲斷事者有二種一者說法  
毗尼二者作折伏羯磨乃至別住羯磨默然  
起去者起離坐去不白者若白非時入聚落

不名爲白白往尼精舍教誡不名爲白白離  
食家不名爲白若僧集說法毗尼者應白言  
離說法坐去荅言爾若僧集作折伏羯磨乃  
至別住羯磨者應白并與欲比丘者現前僧  
中不白去者波夜提波夜提者如上說若僧  
集欲作折伏乃至別住羯磨比丘欲去者應  
白并與欲不白與欲者波夜提白而不與欲  
越毗尼罪不白不與欲一波夜提一越毗尼  
白并與欲無罪若欲大小便須臾還不廢僧  
事無罪若作是念設晚來者應白并與欲若  
說法說毗尼者應白去不白去者越毗尼罪  
若比丘聽衆多比丘誦經應白去不白去者

越毗尼罪若誦經者止誦作餘語去者無罪  
若比丘聽他比丘受經應白去不白去者越  
毗尼罪若比丘聽他誦經應白去不白去者  
越毗尼罪是故說

佛住舍衛城廣說如上爾時諸比丘阿練若  
處住非時入聚落爲世人所嫌云何沙門釋  
子阿練若處住非時入聚落何所求欲諸比  
丘以是因緣往白世尊佛言呼是比丘來來  
已佛具問上事汝實爾不荅言實尔佛語比  
丘汝云何阿練若處住非時入聚落應爲世  
人所譏從今日後不聽阿練若處住不白比  
丘非時入聚落復次佛住舍衛城廣說如上

爾時有二比丘阿練若處住時一比丘泥房  
爲虵所螫語伴言長老我爲虵所螫荅言待  
我取僧伽梨當往呼耆域醫王取衣中間即便  
失音彼取衣已白言長老我非時入聚落時  
比丘不能言如是至三白言長老我非時入  
聚落猶故不言彼作是念世尊制戒不聽阿  
練若處不白比丘非時入聚落是比丘而不  
報我當任其行業知復如何即便命終諸比  
丘以是因緣往白世尊佛言呼是比丘來來  
已佛具問上事汝實爾不荅言實尔佛語比  
丘彼若慈心稱四大龍王名者應致不死何  
等四持國龍王伊羅國龍王善子龍王黑白

龍王我有慈無足衆生我有慈兩足無足衆生  
我有慈四足衆生我有慈多足衆生我有慈無足  
衆生莫害我兩足衆生莫害我四足衆生莫  
害我多足衆生莫害我一切衆生應得無漏  
一切賢善慈心相視莫興惡意設使比丘稱  
是四大龍王名者應不致死從今日後聽除  
急時佛告諸比丘依止舍衛城住者皆悉令  
集以十利故與諸比丘制戒乃至已聞者當  
重聞若比丘阿練若處住非時入聚落不白  
比丘除餘時波夜提比丘者如上說阿練若  
處住者若離城邑聚落五百弓弓長五肘於  
其中間無人住是名阿練若處非時者後舍

已竟時雖早猶是非時聚落者垣墻障乃至  
亂居聚落白者若言白離食家不名為白若  
言白往尼精舍教誡不名為白若言白離說  
法處不名為白應白言長老我非時入聚落  
前人言可爾比丘者界現內前非徒衆現前除  
餘時者若比丘種種疾病為虵所螫為喚醫  
故世尊說無罪若二比丘在阿練若處住若  
欲俱行展轉相白若一人說已行後人復欲行  
者應白餘比丘若無餘比丘者應作是念若道  
中若門若聚落若尼精舍見比丘當白白已然  
後非時入聚落若比丘道路行從聚落中過  
聚落中路邊有塔若天祠當順道直過若下

道左旋右旋去者波夜提若火起若種種惡  
畜來逐人者隨意去無罪若比丘遠行道路  
日暮欲入聚落宿不得荷負囊襪而入若村  
外有水應林中止息先令二比丘淨洗浴著  
僧伽梨施細展轉相白遣入聚落求宿止處  
若得宿處應從檀越索隨所安還出聚落語  
諸比丘已得宿處爾時諸比丘應淨洗手足  
欲飲非時漿者即於此飲之若入聚落勿令  
人譏沙門夜食衣囊襪器分張持去著僧伽  
梨安細捉杖持蓆展轉相白然後當入已到  
宿處復欲出取薪草水者若從本道出者無  
罪若更從餘道應白不白去者波夜提若欲

求塗足油非時漿勸化明日食者白已當去  
不白去者波夜提若聚落中有僧伽藍道上  
有屋連接覆去者無罪餘道去者應白不白  
去者波夜提是故說

不滿二十

共賊伴

掘地

四月請未學

飲酒 輕他

默聽

嘿起非時

八跋渠竟

佛在舍衛城廣說如上爾時尊者優波難陀  
晨起著入聚落衣到檀越家語白優婆夷凡  
夫人苦命終多墮惡道汝當聽我說法時優  
婆夷料理家業衆事忘務無暇聽法便嫌比  
丘言量今凡夫人若死墮惡道阿闍梨但自憂



已莫憂他人後食竟令弟子蕩鉢復入其家  
如前語曰優婆夷凡夫人若死墮惡道汝當  
聽我說法時優婆夷飯食夫主兒子竟後自食  
不容得聽復嫌比丘言置令凡夫人若死墮  
惡道阿闍梨但自憂已莫憂他人諸比丘聞  
已以是因緣往白世尊佛言呼優波難隨來  
來已佛具問上事汝實尔不荅言實尔佛問  
比丘汝食後去作何等事荅言多事世尊我欲  
作醫療治衆病佛言汝云何同食處食前食  
後不白比丘行至餘處從今日後不聽同食  
處食前食後不白比丘行至餘處  
復次佛住舍衛城廣說如上尔時佛告阿難

汝語諸比丘安居已訖語檀越施安居衣阿  
難即語諸比丘諸比丘言世尊制戒不聽同  
食處食前食後不白比丘行至餘家我等與  
諸梵行人同食共住敬難故不敢數白阿難  
以是因緣往白世尊佛言從今已後聽衣時  
佛告諸比丘依止舍衛城住者皆悉令集以  
十利故與諸比丘制戒乃至已聞者當重聞  
若比丘同食處食前食後不白比丘行至餘  
家除餘時波夜提餘時者衣時是名餘時比  
丘者如上說同食者或米一鉢他作飯或麩  
兩鉢他或麥飯三鉢他魚肉若半鉢若一鉢  
是名同食食前者未食食後者食已日雖早

故名食後行至餘家者刹利家婆羅門家毗舍家首陀羅家白者若白非時入聚落若白往比丘尼精舍若白離說法處不名為白應白言長老憶念我某甲離同食行至餘家答言亦除餘時者世尊說無罪餘時者衣時衣時者無迦絺那衣一月有迦絺那衣五月衣時中間捨五罪別衆食處處食離同食不白畜長衣離衣宿無罪波夜提者如上說若比丘離同食欲餘行者應白不白去者波夜提若於他處食五正食五雜正食二波夜提不白離同食處處食若作施食法若衣時者二俱無罪若比丘任處無食若有人請食即彼處

名爲同食若於彼欲餘行者應白去不白去者  
如上說若比丘受聚落中請即彼處名同食  
日早欲餘行經過應白去不白去者如上說若  
聚落中請僧食有比丘過到其家檀越言尊  
者我今日飯僧尊者亦受我請比丘受者即  
名同食日時尚早比丘復欲餘行應當白不  
白去者波夜提餘如上說若檀越請僧食比  
丘乞食遇到其家檀越言我今請僧食尊者  
亦受我請若比丘受者亦名同食比丘尋自  
思惟檀越信施心重我不能消不如行乞趣  
得支命欲捨去者應白不白去者波夜提餘  
如上說若二比丘各有食處俱向聚落道中

議言我等今日先一家食然後次第其餘家  
食後食一比丘應白不白去者波夜提若至  
先食家得五正食五雜正食二波夜提離同  
食處處食若作施食法若衣時二俱無罪第  
二人亦如是若比丘乞食家家得一升二升  
乃至一斛取無罪若一家或得一鉢他米飯  
或麩兩鉢他或麥飯三鉢他若魚肉半鉢一  
鉢更不得餘處求是中何者犯何者不犯一  
切粥除魚肉粥粥者取新出釜盡不成字一  
切菜一切麩一切菓非別衆食非處處食非  
滿足食是故說

佛住舍衛城廣說如上是中應說末利夫人

因緣如中阿含經中說乃至長老比丘次第  
入宮教誡爾時尊者優陀夷次入教誡時末  
利夫人著細塗施衣金銀珠璣莊校衣上在  
宮內坐時優陀夷入宮夫人見已敬心卒起  
金銀珠璣重塗施衣滑墮地夫人慚愧即便  
蹲住諸侍人以身障之時優陀夷見已却行  
而出還到精舍語諸比丘長老波斯匿王覆  
藏寶器我今已見諸比丘問言汝見何等答  
言見末利夫人諸比丘言長老汝出家人若  
入聚落當作阿練若意莫戀著衆色見如不見  
聞如不聞答言我實見可言不見耶諸比丘  
以是因緣往白世尊佛言從今日後不聽比

丘入王宮諸比丘不入宮故諸夫人語末利  
夫人坐汝使諸比丘不復來入我等不得聞  
法禮僧末利夫人言何故怨我汝自求王諸  
夫人即白王言大王諸比丘何故不復入宮  
教誡時波斯匿王聞此語已往詣佛所稽首  
禮足却坐一面白佛言世尊諸比丘何故不  
復入宮教誡佛言大王是中有過如來見已  
不聽復入波斯匿王白佛言是中有何過患  
可得聞不佛告大王有十事過患比丘不得  
入王宮十事者如中阿含經中說比丘不得  
入王宮王白佛言世尊佛見過患制比丘不  
得入王宮我本未生信時自身右手猶尚不

信況復比丘佛已制戒但當隨順佛告諸比丘依止舍衛城住者皆悉令集以十利故爲諸比丘制戒乃至已聞者當重聞若比丘入刹利灌頂王宮王夫人寶未藏入過門限波夜提比丘者如上說王者刹利種婆羅門種優伽羅王種捨遮耶王種婆那王種如是等比

或是王非刹利入者無罪是王是刹利非灌頂入無罪是王是刹利是灌頂無國土入無罪是王是刹利是灌頂有國土不得入入宮者入內宮王夫人未藏寶者王夫人未出寶未藏者王寶未出至過門限者波夜提波夜提者如上說若王新作宮殿信心歡喜請比



丘言尊者爲我故願先受用比丘應語世尊  
制戒不得入宮王復言尊者頗有方便得開  
通不應荅言王夫人寶盡出然後得入若以出  
者應入比丘入已王夫人寶物從後次第入  
比丘不得捨出爾時坐無罪若比丘中間爲  
大小行出不得復入入者波夜提若王常遊  
觀池林於中作王行宮王夫人寶物盡出在  
中有七重門若入一門二三乃至六門無罪  
第七門一脚入越毗尼罪兩脚過門限者波  
夜提若王遊觀已夫人寶物盡出行宮已空  
衆人入者比丘入無罪若王信心愛敬手牽  
比丘入無罪是故說

佛住舍衛城廣說如上舍衛城內有作象牙  
師字法與時有比丘到其家語檀越爲我作  
鍼筒即便爲作不大不小光色滑澤持來還  
房諸比丘見已問言長老何處得是不大不  
小光色滑澤答言象牙師字法與爲我作之諸  
比丘聞已各各往索牙師念曰諸比丘皆當  
須用又念衆僧是良福田我當請僧布施鍼  
筒即詣祇洹頭面禮僧足已白言我法與請  
僧欲施鍼筒諸比丘聞已各各往取或取一  
去或取二三乃至取十象牙遂盡檀越言牙已  
盡今唯有骨須者當作答言皆須骨盡復白  
骨亦盡今唯有角須者當作答言皆須索者

衆多無以供命爾時尊者舍利弗時至著入  
聚落衣持鉢入舍衛城乞食次至其家時法  
與婦信心歡喜持食出施先識舍利弗即頭  
面禮足在前而立舍利弗問言姊妹家內何  
似事業增不答言家內粗可但事業不增問  
言何故答言尊者我家夫主請諸比丘施與  
鍼筒諸比丘或取一去或取二三乃至取十  
牙盡取骨骨盡取角索者衆多無以供命尊  
者我家仰是生活衣食兒子充官賦調尊者  
是我敬重作是言耳以是故夫主在言不在  
覺而言眠

爾時尊者舍利弗爲是女人隨順說法發歡

喜已來還精舍以是因緣具白世尊佛言呼  
諸比丘來來已佛具問上事汝實爾不荅言  
實尔佛言從今日後不聽象牙骨角作鍼筒  
佛告諸比丘依止舍衛城住者皆悉令集以  
十利故爲諸比丘制戒乃至已聞者當重聞  
若比丘牙骨角作鍼筒破已波夜提比丘者  
如上說牙者鳥牙魚牙摩伽羅牙猪牙如是  
諸餘牙等骨者鳥骨馬骨牛骨駝骨龍骨如  
是諸餘骨等角者牛角水牛角犀角鹿角羊  
角如是諸角等作者若自作若使人作破已  
波夜提悔過不破悔過者越毗尼罪波夜提  
者如上說爾時世尊制戒不聽牙骨角作鍼

筒時諸比丘便持金銀瑠璃頗梨玉寶作之  
佛言不聽金銀寶等作鉢筒應用銅鐵白鐵  
鉛錫鍮石白銅竹木欽婆羅氎氎鳥翮乃至  
鉢囊帶是故說

佛住舍衛城廣說如上爾時齋日月八日十  
四日十五日城內人民出城禮拜世尊時波斯  
匿王子亦來禮拜次第至難陀優波難陀所  
頭面禮足已白言我欲觀看願示我處荅言  
甚善即將至閣上語言童子看是柱梁榱棟  
欂栳枅衡雕文剋鏤種種綵畫次至難陀住  
處見青色地敷高大床施置重蹬敷拘攝褥  
兩頭施枕見已即問尊者是誰床褥荅言我

許王子言此大嚴麗非比丘所宜即復問言  
若非我所宜誰應畜者荅言若王王子所應  
服飾比丘言我非王子耶若世尊不出家者  
應作轉輪聖王居四天下汝等一切是我人  
民然世尊不樂是處出家成佛作法輪王我  
是法輪王子設復服飾過此猶尚是宜況此  
麁物王子聞已慚愧無言諸比丘以是因緣  
往白世尊佛言呼難陀優波難陀來來已佛  
具問上事汝實爾不荅言實爾佛言汝等云  
何嚴飾床褥為世人所譏從今日後不聽過  
量作床復次佛住舍衛城廣說如上世尊制  
戒不聽過量作床諸比丘如量截已即以斷

頭還支床脚爾時齋日八日十四日十五日  
城內人民出禮拜世尊波斯匿王子亦來禮拜  
次至難陀優波難陀所語曰尊者示我觀看  
處乃至到難陀房中見已即問何故截此床  
脚荅言齊截以上世尊所聽王子言若世尊  
聽齊截以上而今還以支床與本何異諸比  
丘以是因緣往白世尊佛言從今日後床脚  
應量不聽復支佛告諸比丘依止舍衛城住  
者皆悉令集以十利故為諸比丘制戒乃至  
已聞者當重聞若比丘作床脚應量作高脩伽  
陀八指除入若高過量作截已波夜提比丘者  
如上說卧床坐床者各十四種如上說是中

過量者犯作者若自作若使人作脩伽陀者  
如來應供正遍知八指者佛八指過者過量  
入陞者齊孔以下截已波夜提悔過不截悔  
者越毗尼罪波夜提者如上說若自作終日  
坐上一波夜提若起已還坐隨坐一一波夜  
提他床而坐上者越毗尼罪支脚床亦應量  
當使堅牢若客比丘來次第付床得過量床  
應語知事者言借我鋸來問作何等答言此  
床過量欲截今如法若知事者言莫截檀越  
見者或能不喜若不久任者斲地埋脚齊量  
止若久任者應齊埋處木筒盛脚勿使爛壞  
若比丘入聚落至檀越家坐若床脚高者不



得懸脚坐若是知舊應索承足机若非知舊  
應索塼木承足而坐若福德舍中床高坐者  
無罪是故說

佛住舍衛城廣說如上爾時齋日月八日十  
四日十五日城內人民出禮覲世尊波斯匿  
王子亦出禮拜次至難陀優波難陀所語言  
比丘示我觀看處答言甚善即將至閣上示言  
王子看是柱梁榱棟欂櫨科枅衡雕文剋鏤種  
種綵畫次至已房見青色地敷好坐床敷兜  
羅蓍兩頭赤枕以白氎覆上見已即問是誰  
所有答言我許王子言此大嚴麗非尊者所  
宜答言若非我所宜誰復應畜王子答言王王

子大臣所應服飾復言我非王子耶世尊若  
不出家應作轉輪聖王居四天下汝等一切  
是我人民然世尊不樂是處出家成佛作法  
輪王我是法輪王子服飾設復過此猶尚是  
宜況此麁物王子聞已慚愧無言諸比丘以  
是因緣往曰世尊佛言呼難陀優波難陀來  
來已佛具問上事汝實爾不荅言實尔佛言  
汝云何以兜羅綿紵蓐爲世人所譏從今日  
後不聽兜羅綿紵蓐佛告諸比丘依止舍衛  
城住者皆悉令集以十利故爲諸比丘制戒  
乃至已聞者當重聞若比丘兜羅綿紵蓐若  
坐若卧挽出已波夜提比丘者如上說兜羅

者阿迦兜羅婆迦兜羅鳩吒闍兜羅角兜羅  
草兜羅綿尸兜羅華兜羅諸餘兜羅等是名兜  
羅是中兜羅紆蓐挽出已波夜提悔過挽出  
時抖擻令盡若不盡者以水沾手摩將令淨  
然後波夜提悔波逸提者如上說若自作終  
日坐一波夜提起已還坐隨坐一波夜提他  
許坐上者越毗尼罪若紆枕枕頭支足越毗  
尼罪若病枕頭支足無罪若以兜羅紆皮枕  
得二越毗尼罪皮及兜羅若比丘入聚落兜  
羅風吹著比丘衣合衣坐者越毗尼罪應拂  
去而坐若車載兜羅若擔若負風吹著比丘  
衣合衣坐者越毗尼罪應拂去而坐若敷草

兜羅比丘不得坐若比丘角兜羅田中行著  
衣不得坐應拂去若草兜羅華兜羅田中行  
著衣不得坐應拂却若敷草草兜羅坐上越  
毗尼罪斂草華兜羅坐越毗尼罪作田中亦越  
毗尼罪若爲律師法師敷尼師壇及坐具散  
華著上不得坐拂却而坐無罪是故說

佛住舍衛城廣說如上有五事饒益故如來  
應供正遍知五日一行諸比丘房見諸比丘  
床蓐卧具垢穢不淨處處沾汙如蔓陀羅著  
日中曝曬佛問諸比丘是誰床蓐卧具垢穢不  
淨荅言是諸比丘卧具不以物覆是故汙尔  
佛言從今日後聽作尼師壇復次佛聽作尼

師壇已諸比丘合縷作五事饒益故如來應  
供正遍知五日一行諸房舍見合縷壘垢穢  
不淨處處沾汗如蔓陀羅著日中曝曬佛  
知而故問是誰合縷作尼師壇垢穢不淨答  
言世尊聽作尼師壇諸比丘合縷作佛告諸  
比丘汝等云何合縷作尼師壇從今日後當  
應量作長二脩伽陀擦手廣一擦手半復次  
佛住舍衛城廣說如上爾時衆多比丘在講  
堂上論議作是言長老世尊制尼師壇大小  
若敷坐處兩膝則無若敷兩膝坐處復無諸  
比丘以是因緣往白世尊佛問比丘僧中上  
座是誰答言舍利弗佛語舍利弗衆多梵行

人作是論汝云何默然而聽今當罰汝在日  
中立舍利弗受罰即立日中時諸比丘各前  
懺悔白言世尊尊者舍利弗身體軟弱願恕  
其憊勿令不樂佛語諸比丘非爲不樂彼身  
風冷病得日乃適然日月星宿在虛空中猶  
可迴轉舍利弗以受如來罰心不可迴轉諸比  
丘白佛言世尊云何尊者舍利弗心不可迴  
轉佛言不但今日心不迴轉過去世時以曾  
如此如蚘本生經中廣說尔時蚘者即舍利弗  
是彼時心堅不可迴轉復次佛住舍衛城廣  
說如上五事饒益故如來應供正遍知五日  
一行諸比丘房見僧蓐具中央鮮好兩邊垢

汗佛知而故問比丘是何等卧具中央鮮好  
兩邊垢汗荅言世尊制尼師壇小不得盡覆  
故齊覆處淨不覆處汗佛言從今日後聽兩  
重作不得趣尔厭課持小故氎覆當兩重作  
若用欽婆羅一重作劫貝二重作復次佛住  
舍衛城廣說如上爾時尊者阿那律持尼師  
檀著肩上禮世尊足佛知而故問汝肩上是  
何等荅言小尼師壇世尊是尼師壇太小唯  
願更益佛言更益幾許可足荅言一搥手佛  
言聽一搥手佛告諸比丘依止舍衛城住者  
皆悉令集以十利故與諸比丘制戒乃至已  
聞者當重聞若比丘作尼師檀應量作長二

脩伽陀擦手廣一擦手半更益一擦手若過作  
截已波夜提比丘者如上說作者若自作若  
使人作尼師壇者世尊所聽應量者長二脩伽  
陀擦手廣一擦手半長者縱廣者橫脩伽陀  
者如來應供正遍知擦手者如來擦手長二  
尺四寸益擦手者二重三重對頭却刺若過  
量者截已波夜提悔過不截而悔越毗尼罪  
波夜提者如上說長應量廣過量若自作若  
使人作成波夜提受用越毗尼罪廣應量長過  
量中央應量邊過量邊應量中央過量若自作  
若使人作作成波夜提受用越毗尼罪疊量縮量  
水灑量欲令乾已長大若作成波夜提受用越



毗尼罪作時當應量作不得量過尼師壇是隨  
坐衣不得作三衣不得淨施及取薪草盛巨  
磨唯得敷坐若道路行得長疊著衣囊上肩  
上擔是故說

佛住舍衛城廣說如上世尊五事饒益故五  
日一行諸比丘房見膿血瘡痂著衣在日中  
曝佛知而故問是何等衣不淨若此荅言世  
尊諸比丘病疥瘡故是以汗衣佛言從今日  
後聽作覆瘡衣復次佛住舍衛城廣說如上  
爾時世尊聽作覆瘡衣已諸比丘不截縷合  
縷作世尊以五事饒益故五日一行諸比丘  
房見合縷作覆瘡衣膿血垢汗日中曬佛知

而故問是何等衣合縷作不淨若此答言出  
尊聽作覆瘡衣諸比丘合縷作膿血垢汗佛  
語諸比丘汝云何合縷作覆瘡衣從今日後  
應量作覆瘡衣佛告諸比丘依止舍衛城住  
者皆悉今集以十利故與諸比丘制戒乃至  
已聞者當重聞若比丘作覆瘡衣應量作長  
四修伽陀擦手廣兩擦手半若過作截已波  
夜提比丘者如上說覆瘡衣者世尊所聽應  
量長廣修伽陀擦手者如上說若過量者截  
已波夜提悔過不截而悔越毗尼罪波夜提  
者如說長應量廣過量廣應量長過量中央  
應量邊過量邊應量中央過量若自作若使

人作成波夜提受用者越毗尼罪屈量縮量  
水灑量欲令乾已長大作成波夜提受用越  
毗尼罪當作應量是覆瘡衣隨身衣不得作  
三衣不得淨施不得取薪草盛巨磨欲入聚  
落時當先前著然後著僧伽梨施細出聚落已  
脫僧伽梨抖擻襞疊舉著常處覆瘡衣勿令燥  
脫剥瘡血出當合著入水不得入僧常所浴  
處當在屏處浸漬令釋然後脫之浣濯令淨  
浴已得持拭身後日用時亦復如是乃至瘡  
瘡瘡已得作三衣及淨施餘用是故說  
佛住舍衛城廣說如上如三十事中毗舍佉  
鹿母廣說乃至十二由延內布施比丘兩浴

衣復次佛住舍衛城廣說如上爾時世尊聽  
比丘作雨浴衣時諸比丘不截縷合縷作世  
尊以五事利故五日一行諸比丘房見合縷  
氎垢汗不淨日中曬佛知而故問是何等衣  
合縷作不淨若此荅言世尊如來聽作雨浴  
衣諸比丘合縷作垢汗不淨佛語諸比丘汝  
等云何合縷作雨浴衣從今日後應量作長  
六修伽陀搽手廣二搽手半佛告諸比丘依  
止舍衛城住者皆悉令集以十利故爲諸比  
丘制戒乃至已聞者當重聞若比丘作雨浴  
衣應量作長六修伽陀搽手廣二搽手半若  
過量截已波夜提比丘者如上說雨浴衣者

世尊所聽應量者長六修伽陀擦手廣二擦  
手半長廣修伽陀擦手者如上說若過量者  
截已波夜提悔過不截悔過者越毗尼罪波夜  
提者如上說長應量廣過量廣應量長過量  
中應量邊過量邊應量中過量若自作若使  
人作成波夜提受用越毗尼罪屈量縮量水  
灑量欲令乾已長大若自作若使人作作成波  
夜提受用越毗尼罪比丘五法成就僧應拜  
作分兩浴衣何等五不隨愛不隨瞋不隨怖  
不隨癡知得不得羯磨者應作是說大德僧  
聽某甲比丘五法成就若僧時到僧拜某甲  
比丘分兩浴衣白如是

大德僧聽某甲比丘五法成就僧今拜某甲  
比丘分兩浴衣諸大德忍某甲比丘分兩浴  
衣忍者僧默然若不忍者便說僧以忍拜某甲  
比丘分兩浴衣竟僧忍默然故是事如是持  
作羯磨已應衆僧中唱言諸大德是中分物  
參差不同相降四指八指理不得計若不唱  
者得越毗尼罪從四月一日得兩浴衣從上  
座次第付得已不聽裸浴又不得著兩浴衣  
應著餘故衣若在屏處若深水裸浴無罪不  
得著兩浴衣作衆僧治堂舍作及白灰作泥  
作覆屋作通水溝杼井作當著餘故衣是雨  
浴衣不得作三衣不得淨施不得餘用持取

薪草及盛巨磨不得著入池水潢水中浴大雨時得著小小雨不得著若大雨卒止垢穢未淨著入池水潢水中浴若比丘病服藥吐下刺頭出血及露地食時得持作漫障此雨浴衣四月半受用至八月十五日應僧中唱言諸大德今日僧捨雨浴衣如是三唱捨已得受持作三衣若淨施得作餘用是故說佛住王舍城廣說如上爾時諸比丘著留縷衣諸外道亦著留縷衣時優婆塞欲禮比丘誤禮外道聞呪願異知非比丘即便慚愧時外道弟子欲禮外道誤禮比丘如是參錯諸比丘以是因緣往白世尊佛言從今已後比丘衣應

截縷作淨染作淨外道欲與比丘作異故留  
朱羅赤石染衣捉三竒杖持軍持復次佛住  
舍衛城曠野比丘得拘舍耶衣欲染者煮染  
汁如上三種染衣色中說

佛住舍衛城毗舍離比丘得欽婆羅亦如上  
說復次佛住舍衛城時尊者孫陀羅難陀是  
佛姨母子有三十相食後從舍衛城出阿難  
隨後亦如上三色衣中說復次佛住舍衛城  
尔時尊者阿羅軍荼倣佛衣量作衣著入舍  
衛城是比丘身短衣長曳地而行爲世人所  
譏沙門釋子曳衣而行又人訶言汝不知耶瞿  
曇沙門衣非己父母作敗復更得是故如是



諸比丘以是因緣往白世尊佛言呼阿羅軍  
荼來來已佛具問上事汝實爾不荅言實尔  
佛言從今日後當隨自身量作衣佛告諸比丘  
依止舍衛城住者皆悉令集以十利故與諸  
比丘制戒乃至已聞者當重聞若比丘倣如  
來衣量作衣若過量截已波夜提如來衣量  
長九修伽陀擦手廣六擦手是名如來衣量  
比丘者如上說如來衣量者長九修伽陀擦  
手廣六修伽陀擦手長者縱廣者橫修伽陀  
者如來應供正遍知擦手者如來擦手長二  
尺四寸若過者截已波夜提悔過不截悔者  
越毗尼罪波夜提者如上說長應量廣過量

若自作若使人作作成波夜提受用越毗尼  
罪廣應量長過量中應量邊過量邊應量中  
過量若屈量縮量水灑量欲令乾已長大若  
自作若使人作作成波夜提受用越毗尼罪  
作時當減量不得過量當隨自身量是僧伽  
梨有三種上中下上者長五肘廣三肘中者  
長五肘一不舒手廣三肘一不舒手下者長  
四肘半廣三肘一不舒手著衣時緣相降二  
指作鬱多羅僧有三種上中下上者長五肘  
廣三肘中者長五肘一不舒手廣三肘一不  
舒手下者長四肘半廣三肘一不舒手作安  
隨會亦有三種上中下上者長五肘廣三肘

中者長五肘一不舒手廣三肘一不舒手  
者長四肘半廣二肘一不舒手下至覆三莖  
隨羅作泥洹僧是故說

摩訶僧祇律卷第二十

登

玩反愚貫搆乳正上古候反透字違慵煖上呂孔反反

造家到上七躄地益上毗蝦蟆下上音遇酢漬字上醋下

在智殿音帝滴釀反尼向校取古上正作絞麩魚列

反醪來高墟邏下上起居反哆丁可佷度上懇反胡列

帝零談譁花下音整呼各反囊襍下與粗才古

仰是上吾犀音翻閑革榱棟上率追反榼料下

下音斗廬枅衡上西音更反雞下蹬反丁鄧脾非下王

擦手

上

反知

慤

反去

軋

軋

瘡

加

痂

下

音

拖

他音

者

從

亦上

反必

潢水

上

音

參

錯

上

七

含

反

反

倣

方

同

者

從

亦上

反

必

紵

丈

与



